

Xpresa bo mes

E herencia lubida di Mito Croes

Pa: Armand Hessels

DIA 27 di augustus 2016, dr. Antonito 'Mito' Gordiano Croes a fayece inesperadamente pa motibo di un atake di curazon. Durante e siman cu a pasa cu tur razon a dedica hopi atencion na su conseho, e funcionnan cu el a ocupa y su produccionnan científico, tur a base di su experticio riba tereno di ley estatal.

Apesar di su acercamento científico, Mito Croes no a produci teoria so. Un di su produccionnan mas importante tabata raport Calidad cu a traha bou di su Presidencia hunto cu mr. H. Fransen (hurista), mr. N. Henriquez (hurista) y sr. F. de Kort (registeraccountant). A scirbi e raport aki pa e practica real. Y ki sorto di practica!

Ya pa hopi aña caba e calidad di gobernacion na Aruba y Antia Hulandes a laga hopi di desea. Pa Mito Croes esaki tabata asina problematico cu e, como Ministro Plenipotenciario, a tuma e iniciativa pa un simposio di Reino na 1995 cu e tema 'Bon gobernacion na pais chikito'. E meta tabata pa yega na 'cambio fundamental y mehoracion di calidad riba nivel di gobernacion na unda lo salbuardia bon gobernacion den nos comunidad di escala chikito'.

Na fin di e simposio, Ministro-Presidente di Aruba a propone pa forma un comision mixto den contexto di Reino cu e tarea pa –usando tambe resultado di e simposio– formula proposicion concreto pa accion cu lo mehora

calidad di gobernacion na Aruba y Antia Hulandes.

Na principio di 1997 esaki a conduci na instalacion di e grupo di trabou 'Calidad di gobernacion' bou di presidencia di mr. dr. A. G. (Mito) Croes. Ya caba na october 1997 a publica e raport Calidad.

Raport Calidad no ta describi explicitamente a fayonan di politica di Aruba, pero mas bien ta duna recomendacion pa mehoracion di diferente aspecto di gobernacion.

For di e recomendacionnan aki sí ta bira cla ki fayó tabatin cu mester a coregi urgentemente segun e grupo di trabou.

Gobierno (di AVP) di e tempo ey a ricibi e raport y a dicidi di ehecuta e recomendacionnan integralmente den ley nobo.

P'esey hasta a haci palabracion cu sindicato, locual e diferente organisacion di dunador di trabou tambe a acorda den Protocol 2000 cu mientrastanto tur hende a lubida.

Aunke a cuminsa cu hopi entusiasmo, ya caba na 2001 a para tur actividad. E calidad dudoso di gobernacion di e Gobierno di e tempo ey tabatin consecuencia serio pa su credibilidad. Ademá formacion di un Gobierno nobo di un otro color politico y cu otro prioridad posiblemente tambe a contribui n'esey.

Di e 20 recomendacionnan a realisa apenas un parti hopi chikito. E recomendacionnan

principal cu tabata enfoca riba financiamiento di partido politico, maneho di personal, administracion financiero y control no a sobrebibi.

Consecuentemente patronahe politico, un administracion financiero pesimo y proyecto dudoso a keda determina e imagen politico. Mientrastanto esakinan a conduci na un debe nacional gigantesco cu tur su consecucionan y cu duda funda riba integridad di gobernante y parlamentario.

Pesey tambe gobernacion di calidad ya no mas ta un simpel cuestion di moral of etica, pero un necesidad urgente.

Esnan cu a traha raport Calidad tabata masha bon na haltura di e practica politico.

Ademá (mayoria di) e recomendacionnan te dia di awe tin hopi balor pa realisacion di bon gobernacion. Esaki ta hopi necesario mes.

Pesey tambe Fundacion Gobernacion di Calidad Aruba (FGCA) cu hopi agradecimento lo haci uzo efectivo di e herencia lubida aki di Mito Croes, mescos cu di e palabracionnan –cu no a cumpli ainda– di Protocol 2000.

Realisacion di e ideal di Mito Croes pa bon gobernacion na Aruba, den cooperacion cu e.o. ciudadano, manera organisa den FGCA, lo t'e mihor muestra di honor di e alumno di Mito Croes y su partido, na homenahe di nan gran arkitecto, especialmente despues di e ultimo 19 aña, na unda solamente a presta servicio di lip na dje.